



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

Ayush Mhatre taküm IPL nung ojang dang asayatetsü akok

North Korea-i ano ballistic missile tem tendangogo



VOL. XXIII ISSUE NO. 186 (ADOK 186) DIMAPUR TENTONÜ (MONDAY) RONGCHII (APRIL) 20, 2026

₹ 5.00

Assam sensotemi 'press freedom' maliba atema tebilemetsü abener

Guwahati, April 19, 2026 (Agencies): Assam nung press freedom mali akümba aser journalists amokmerena aruba atema tebilemetsü bena sensotemi ola adoker.

Deobarnü Asam Sahitya Sabha kidang Lakhiram Barua Sadan nung senden ka amendang iba khuret lemsatepogo.

Iba sentong ya Guwahati Press Club (GPC) ajanga ayongzük aser journalists, legal experts, political figures aser civil society züngsemtem aden.

"Media-i tetsübu melii inyaksangshi mesütetba linük ka dang democracy ta ajatsü makok" ta GPC president Khagen Kalita-i ashi.

Assam nung journalists inyaksangshi aser maitsü anema ken o tem adokba atema ashishiteper ta senden nung adenertemi ashi.

Assam nung media infrastructure dak teka aitba aitsür aser tawa newspaper rongdoktsüba aser media offices raksatsüba tensatem asenoki ajuruogo ta pamokisa metetdaksü.

Tawa sorkar tanishirtem aser press tsüngda ken o agütsütepba atema tebilemetsü abener ta senior advocate Anil Kumar Bhattacharya-i ashi.

"Chief Minister-i media persons anema jembi aser iba

amokmerenba ya küm ishika inyaka arur. Chief Minister-i jembiba olen shiaji temzüng alema lir" ta Bhattacharya-isa ashi.

Senior advocate Arup Borbor-ia media teloktem dang kechi tensa ajurudir ajuruaka ochimashi yimjak nung tuteta sayutsü atema noktaksü ayongzük.

Paisa media nisungtem kümzüka ayutsü atema citizens' forum ka tentetsü junger ta shidanga liasü.

"Media-i bangdakpur dang kecha masüngdangtetsüsa alenbanga ayuba ya democratic inyakyim alema lir" ta Asom Jatiya Parishad (AJP) nungi Kunki Chowdhury-ia ashi.

Iba senden nung veteran journalist Ajit Kumar Bhuyan, Nandini editor Maini Mahanta aser senior advocate Santanu Borthakur nung aden.

MLA Akhil Gogoi-i iba tebilemetsü kottetsü atema asalentong yanglutsü atema GPC ketdangpurtem den senden ka amentsü shidanga liasü.

Senden nung Press Club of India president Sangeeta Barooah Pisharoty medentet saka lai Assam nung press aser media pusema nungita züluba shidi ka zünga metetdaksü. Maneni, shishahir Hiren Gohain-i iba mesükba shidi ka züluba zünga sayu.

Governor Yadav-i North East Tribal Spring Festival nung aden



Dimapur, April 19, 2026 (TYO): Nagaland Governor Nand Kishore Yadav-i NEZCC Shilpgram, Guwahati nung mezüngbuba "Uttar-Poorv Janjatiya Basant Utsav" - North East Tribal Spring Festival nung aden.

Governor Yadav ya North East Zone Cultural Centre (NEZCC) nunga Chairman lir aser April 19, 2026 nü benjung nung aden.

"Iba benjung tenzüka nung shilem agiba atema pelar. Iba benjung ajanga North Eastern region tanüla, inyaksangshi takar aser sobaliba temeyoktep indang benjunger" ta Governor Yadav-i ashi.

Paisa tetushi süa jaokertem Guru Jatin Goswami, Guru Drona Bhuyan, Guru Sanyusang S. Pongener, aser Pokhila Lekthepe nung dang pelaba metetdaksü.

"Nenoki art, culture, aser society asoshi mapa tajungba atema tenüngsang agütsür" ta Governor Yadav-i ashi.

Iba benjung ya tsüngküm mongpu aruba tenüng nung dang masü saka temeyoktep nung telongjem adokba indang sayur. North East ya India nung sobaliba noksa ka ama lir aser iba tesem nung kin aika den sobaliba, oshi, subsolemetsü aser tsüngsangba khenyongi balaka lir" ta paisa ashi.

Ibala benjung ajanga iba takar senmang sayur aser ajungketer ta Governor Yadav-isa ashi.

Governor Yadav-isa Basant Utsav indang jembidang iba ajanga tasen kümshiba, teimla aser putepa alitsü sayur ta ashi.

"Lisopurtemi alima aser sobaliba tsüngda tesentaktep tajung ayur. Alima akhümtsübuba aser lokti nung

tangatetba tajung aliba ya tanü loktiliba asoshi tansütsü tajung ka lir" ta paisa ashi.

NEZCC Director Dr. Prashanna Gogoi-i anir tayongertemi iba benjung tulu amungba atema tenüngsang agütsür ta Governor Yadav-isa ashi.

"Iba benjung ajanga sobaliba lemsateptsü aser linük akangshitsü ajungmesor. Tesem balala nungi nisungtem anidenba ajanga kati ka akhümtsübuteper aser angatetteper" ta paisa shisem.

"Kanga kara ainba putu ka nung asenoki lisopur shisatsü aser sobaliba maitsü wazüka ayutsüla. Lanurtemia alima den külemi liromedema aodang pei tera metoktsütsüla. North East-i sobaliba ajanga telongjem aser terenlok aniba tatishitsü tajung sayur" ta Governor-isa metetdaksü.

Northeast nung tzünglu teimba arutsü

Guwahati, April 19, 2026 (Agencies): Küm pungu atongtepa tzüngluruwa mapang Northeast nung tzünglu shitak maru saka takümbo tzünglu tajungba arutsü akok ta India Meteorological Department (IMD)-i metetdaksüogo.

Ajisüaka, Assam nungbo tzünglu shitak marutsü akok ta IMD-isa ashi.

IMD-i June-September monsoon atema first-stage seasonal forecast asüba nung northeastern region nung tzünglu talila arutsü shia lir.

Kuki Inpi Manipur-i civilian 2 tepsetba aitsür

Guwahati, April 19, 2026 (Agencies): Ukhrul district kübok TM Kasom anasa civilian ana tepsetba aitsür ta Kuki Inpi Manipur-i metetdaksüogo.

Iba tatalokba atema temlung süngjema meliteter aser jungjunga bushisüngdang asütsüla ta parnoki ashi.

Iba lendong nung asürtem asoshi mangyimer aser tasür kibongtem den asükhu lemsateper ta KIM-isa metetdaksü.

"Litan tatalokba sülen Kuki aser Tangkhul nung tsüngda mangatettep adokdaksü meranger saka aremzüka dangarur. Sinakeithel aser Litan amala tesemtem nung Kuki nung amakba ajuruogo saka tensa tamajung mekümdaksütsü asoshi tayang meküpzüker" ta KIM-isa ashi.

Tawa tu Thowai nung nisung ana tepsetogo saka onoki iba anema meinyak kechiyong tensa tamajungba küma moudaksünür ta parnokisa metetdaksü.

United Naga Council aser Tangkhul Naga Long-i kuli kecha melii Kuki nung dak tai tongloktsüba atema tebilemetsü abener ta KIM-isa ashi.

Sinakeithel aser Litan temeket nung Arambai Tenggol amala lendelen telungpur teloktem aika lir aser parnoki tensa raksatsür ta KIM-isa metetdaksüogo.

Iba tatalokba atema National Investigation Agency (NIA)-i mapang lateta yur bushisüngdang asütsüla aser aibelenertem kin mereprangi merenshitsüla ta Kuki Inpi Manipur-isa takhangba agütsüogo.

UNC-i Naga nung alidak anogo asemnü mokdangtsü



Imphal, April 19, 2026 (Agencies): United Naga Council (UNC) den All Naga Students' Association, Manipur (ANSAM), Naga Women's Union (NWU) aser tongti teloktemi Manipur nung Naga nung aliba tesemtem nung anogo asemnü mokdangtsü telemtetba agiogo.

Deobarnü Tahamzam nung parnok külem senden ka amendang April 20 ayaterm nungi tenzüker April 23, 2026 tashi mokdangtsü lemetet.

Ukhrul district kübok National Highway-202 nung TM-Kasom

yimtsüng anasa Naga civilian ana tepsetba aitsür ta parnoki metetdaksü.

Tena ya Tashar nung Chinaoshang Shokwungnao (45) aser Kharasom nung Yaruvingam Vashum (42) na ta jangaogo.

Tena ya public highway nung senzüdang len tom nung amak aser tepset. Iba ya security maparen nung metokmeperi inyakba lir aser civilian takümtem lendong nung lir ta teloktemi metetdaksü.

Senden nung adenertemi ola

madoki tasürtem nem akhüm agütsü aser iba mapang ya Chandel Naga People's Organisation (CNPO) Thamdok Francis-i anir agi.

Senden nung adenertemisa Naga nung tesemtem nung security maparen inyakba ashishitepa jembi. Chief Minister aser Home Minister nati Ukhrul district semdangba sülen iba ya atalok ta parnoki ashi.

April 20 nungi April 23 tashi mokdangba dak alia April 23 nikongdang 6.30 ako nung Imphal densema Naga district headquarters ajak nung candlelight vigil ka agitsü telemtetba agiogo.

Iba mangyimba mapang parnoki Kuki nung den lokti aser rongsenketzüng tesentaktep ajak anena atatsü metetdaksüogo.

UNC-isa sensotem, civil society groups aser rejutem dang bangzüngtem sülen anidaktsü aser mangyimba mapang yimjung aser tiptema alitsü mepishia metetdaksüogo.

Mongsenyimti Students' Unit Kohima hon jubilee mungogo



Dimapur, Rongchii/April 19 (TYO): Mongsenyimti Students' Unit Kohima (MSUK) Golden Jubilee mung April 18 nü Nguyusem Kohima nung mungogo. Iba hon jubilee mung nung Mongsenyimti nung kaketshir, tsüraburtem, anükabang aser lokti tentet balala nungi lungjemer munga liasü.

Sentong nung tongti tejaoker Tongpang Ozukum, MLA aser Advisor, Department of Water Resources ajanga taoba

mapang aser tang teinyakdak ketdangpurtem nem tenüngsang agütsü. Taoba mapang pa MSUK tir inyakba bilemteta menungra jembiba den külemi kaketshirtem ano maneni temulung agüja inyaktsü aser MSUK tali tashi taitba nung aotsü asoshi pei akokba sempet agi nungittsü ajungshia liasü. Iba den külemi lenla ajak nung sütep sütepa aintsü ayongzük.

Jubilee nung o jembir Sashi Wapang Lanu, IRS, Additional

Commissioner of the Central GST Commissionerate ajanga, "Lungpak nungi ChatGPT: Pututem tsüngda kaketshir taküm medemdangba" onük zülüa tenzükba tanü asen tendak modern digital gadget ajanga mapa ajak akokba indang rasa jembii.

Tanü putu nung smart phones aser internet ajanga maparen ajak mela mela inyakba tajangzük ashiba den külemi tekümdangtsü otem pai ashi.

Churches Colony nung lokti tentet balalai sarusajiba nokdang

Dimapur, Rongchii/April 19 (TYO): Dimapur nung aliba Churches Colony council Executive meeting ka April 15, 2026 nü amenba mapang nungja balala agütsür kija mesüra telok temi lokti tentet balala tenteta welfare, züngsem office maintenance amala tenüng nung senotsü sarusaji mesüdaktsütsü pangjemtepogo, ta Churches Colony council sangdong ka ajanga ashi.

Pei sasa tentetba unions aser associations temi senotsü bendenba mesüra donation meshiba aitsür. Nagaland nung

shishilempartem, talisa Dimapur nung sendaka alirtem dang kinük-kisang ajungalen nungi saru balala meshiba ajanga khuret tali agütsüba ajaki meteta lir, aser shishilempartem kumzuka ayutsü tenüng nung taila union tentetba tali akumer, aser parnok inyaksangshi ajanga shishilempartem nem tebilemtsü ang tali agütsür, ta ashi.

Anungji tang nungi tenzuka nenok office ajanga ita shia shishilempar dang nungi senotsü saruba ozü jurisdiction telungzük nung memelatsü.

Ner association/union nungi züngsem/temulung kari pei mulungba nung tenlatsü tejangraba lira, parnok nenok indang registered office bushia arua agütsütsü akok, saka ozü jurisdiction nung senotsü saruba khenyongi memelatsü, ta CCC ajanga ashi.

Colony shia nübur ajungtsü asoshi inyaksangshiba anepalutsü aser mangatettep bentettsü council office, GB office aser lanur tentet lir, anungji ozü colony telungzük nung inyakyim nung teka amoshitsü menügdaker, ta sangdong ajangasa metetdaksü.

Meluri nung Assam Rifles-i tanur nem teyari agütsü



Dimapur, Rongchii/April 19 (TYO): Assam Rifles temi Meluri district kübok Open Shelter ka nung tanurtem den sensaksemba sentong ka ayongzuka liasü.

Tanurtem shisaliok nungdarba nung yaritsü aser kasa mapang parnok ajungmesotsü nükjidong nung iba sentong ya ayongzük.

Iba mapang Inspector General Assam Rifles (North)-

i tanurtem den sensaksemba parnok dang shisaliok, yimya tajung aser meranga inyakba indang angatetdakja ajungmesoa liasü.

Tasü ita pei jangraba inyaktsü aser meranga azüngtsü ajungmesoa iba sentong ya ayongzük.

Iba sentong nung shilem ka ama Inspector General-i school juli, anüshi, geometru boxes aser kaketshir longpak tem lema agüja

liasü.

Maneni tanurtem electricity maliba mapang yaritsü atema portable solar lights tem lema agütsü.

Iba sentong nungi tanur 16 ajangzuka liasü. Iba den külemi temang anema alitsü aser teamwork temaba jenjangi ajungkettsü atema volleyball aser football densema saisapong nung amshiba osettsüseta agüja liasü.

SoO kübok Kuki telungpur aser security forces lungjemer inyaker: NSCN/GPRN

Dimapur, Rongchii/April 19 (TYO): Kuki SoO cadres temi April 18, 2026 nü Yaolen Kuki Village anasa külem tenzker Chinaoshang Shokwungnao (Tashar Village) aser Yaruangam Vashum (Kharasom CC Village) tepsetba khukhua aitsür, ta National Socialist Council of Nagalim (NSCN) ajanga sangdong ka nung ashi.

Kuki telungpuri mapa tamajung inyakba ya tatok magütsütettsüsa kumogo, shirnok SoO kübok Indian Security Forces-i kumzuka yua lir.

ashi.

Ibai tenüng agiba kisung masü saka osang balala aser kuli agütsür temi Indian security forces aser Kuki telungpur tem SoO kübok lungjemer inyaksangshiba jangjaogo. Ibai Nagalim nung yimtenren tensa tamajungba kumdaktsütsü aser ethnic conflict tenüng nung 'proxy wars' ajanga temeket region raksatsütsüba nükjidong lir, ta NSCN-i ashi.

Kuki nung den Indian sorkari miimshia inyaksangshiba ya akhi alemli British nung yimsütsüba mapang amshiba policy ka lir, koba Naga nung telemsa adokdakja par tajangzük agitsü tejangraba nung lir.

Tai maket takum samaba asoshi onoki khukhua aitsür aser iba tatalokba tekereba nung indang-indanga aser ochishia bushisüngdangtsü ayongzük, ta sangdong ajangasa ashi.

Parnoki tashiyim agi rara mesüba ajanga tensa tamajungba kumdaktsüba kisung masü saka Indian state mechanism ta ajaba tamakok aluba tsütsüti tali anasa aor. Ozü li aser ozü sovereignty wazüka ayutsü asoshi Naga nung temi akaba defensive mera ajanga bushia inyaktsüsa akumtsü, ta

Chümoukedima nung YMCA unit tasen ka tentetogo



NEISSR, Chümoukedima nung April 18, 2026 nü YMCA unit tasen ka tenzükba mapang tangokba noksa nung angur.

Dimapur, Rongchii/April 19 (TYO): Young Men's Christian Association (YMCA) indang unit tasen ka North East Institute of Social Sciences and Research (NEISSR), Chümoukedima nung April 18, 2026 nü tentetogo.

Iba sentong nung Shamir J Thabah, Vernon Fernandez, Fr. Dr. C P Anto, Jose V Abraham, Dr. Andrew Ahoto, aser Pochister Kharkongor nung den NEISSR indang tesayur aser kaketshir aser Peace Channel indang staff tem aden.

Shamir J Thabah ajanga iba sentong ayongzükba nükjitong rateta jembidang, lanurtem pei sempet sayutsü asoshi sapang agütsütsü nungdarba aser kasa mapang tesunep, telungjem aser service temabai ajungkettsü indang ashi.

Vernon Fernandez-i alima

nung YMCA ajanga inyakba indang otsü tongmelang agi shia liasü.

Fr. Dr. C P Anto-i teamwork, telungjem aser tamangba yimsü balala tsüngta tesendaktep tajung alitsü indang jembii aser lanurtem dang yimya shidak amshiba lenir akumtsü ayongzuka liasü.

Dr. Andrew Ahoto-i tajungshi o jembidang nisung ka yimya tajungba kuma yanglushiba aser tarutsü asoshi lenir yangluba nung yimya tajung nungdaker ta ashi.

Iba sentong nung Shamir J Thabah lenisüba kübok YMCA unit lenirtem anioka YMCA Youth Pledge agia liasü.

Iba sülen ad-hoc committee züngsemtem mulunga agizük aser temaitsü yimya ka ama temu milen tsükloka liasü.



Ecclesia Theological College and Seminary (ETCS) pur 22 buba commencement ceremony ka Dimapur nung aliba campus nung April 16, 2026 nü agia liasü. Sentong nung o jembir General Secretary, Fellowship of Naga Baptist Associations (FNBA), Rev. Dr. H Gideon liasü. Kaketshir 36 nem degree agütsü - Bachelor of Theology nungi kaketshir 19, Master of Divinity nungi 14 aser Master of Divinity (Distance Course) nungi asem.

PM Modi-i Model Code of Conduct alema inyakogo: CPM/CPI



April 19, 2026 nü Bishnupur nung Ato kilonser, Narendra Modi election nüboyim sentong ka nung adenba noksa nung angur.

New Delhi, Rongchii/April 19 (Agencies): Amongnü Communist Party of India (Marxist) aser Communist Party of India (CPI) nati shidi ajanga Election Commission of India (ECI) dang, Ato kilonser Narendra Modi anema inyaktsüla, kechiyong pai assembly election mapang nung Women's Reservation Bill indang jembio, ta metetdaksü.

Party anapronglai, tang Tamil Nadu aser West Bengal na nung assembly elections lia Ato kilonseri jembiba olenji ajanga Model Code of Conduct (MCC) alema inyakogo, ta ashi.

Parnokisa linük meyong Doordarshan ajanga Ato kilonseri jembiba broadcast asüba ashishi.

CPM general secretary MA Baby-i shidi ajanga Chief Election Commissioner (CEC), Gyanesh Kumar dang, "Pai jembiba o, osü aser onükji sorkar sangdong ka, ta ashitsü

makok. Iba ya indangindanga opposition party tem anema party aika tenüng tetshia yimtenren o jembiba liasü aser ruling party tem pusemdaksütsü atema Tamil Nadu den West Bengal nung voters densema nüburtem atsütsü atema jembiba o liasü," ta metetdaksü.

Paisa, "Election mapang ka nung Ato kilonser teinyakdak kati yimtenren o jembitsü atema public broadcaster ka sabang ama amshiba ya election timi agiba anema lir," ta ashi.

CPI lenir Sandosh Kumar-ia shidi ajanga CEC dang, Ato kilonseri jembiba oji nüburtem atsütsü atema jembiba o ka lir, ta ashi.

Kumar-isa, "Ano tebilemsü akatsü kaji, pai jembiba oji Doordarshan aser Sansad TV ama national public broadcasters ajanga broadcast süogo. Yimtenren o jembitsü atema linük aser public meyong

sabang amshibaji election inyakim anema lir," ta metetdaksü.

Kumar-isa, Ato kilonser anema kecha meinyakra ibaji ajanga reju tashi maitba shisangtsü aser nüburtem Election Commission dak tamang katetba samatsü, ta metetdaksü.

Ano külen West Bengal chief minister, Mamata Banerjee-ia, Ato kilonser Modi-i yimtenren machinery tim masüba nung amshio, anungji lar party Trinamool Congress-i EC nem tashishiba ken o agütsütsü, ta metetdaksü.

Amongnü Hooghly district kübok Tarakeswar nung nüboyim sentong ka nung jembidang Mamata-i, "Yimtenren nüboyim atema yashi parnoki (BJP) sorkar machinery tim masüba nung amshio. Onoki iba ya aitsür aser tashishiba agütsütsü," ta metetdaksü.

MK Stalin-i Tamil Nadu election atema DMK manifesto ka saya

Chennai, Rongchii/April 19 (Agencies): Amongnü Tamil Nadu Chief Minister, M K Stalin-i state assembly election atema DMK indang 'Chennai Super-6' ta ser Chennai yimti kija atema temeja manifesto ka sayaogo.

April 23 nü assembly menden 234 atema election agitsü. Chennai nung aliba DMK headquarters, 'Anna Arivalayam' nung Stalin-i party manifesto saya aser mezüngbuba copy ji party organisation secretary R S Bharathi nem agütsü.

Tamil Nadu nung election

agitsü anogo pezünü dang lia DMK manifesto dak alia Chennai atema temeja manifesto sayar.

Iba manifesto nungji tenangzüka onük trok lir, aser item rongnung mini bus tase 1,000 agütsütsü aser ainlen senzüsembongba tezübaba akümsü atema AI transport management aser world-class cultural centre ka lapoktsütsü densema lir.

DMK-isa 2028 küm tashi nungbo Chennai Metro Rail expansion renemtsü, kibur mali nemzüba azü azüoktsü aser artificial intelligence, animation, visual effects aser technologies

atema Centre ka amenoktsütsü nangzüik.

2021 küm election nung DMK-i state yimtiba, Chennai nung aliba assembly menden 16 prongla nung takok ngua liasü, ajisüaka taküm election nungbo actor nungi yimtenren nung ajemoksang Vijay aser pai aniba party Tamilaga Vettri Kazhagam (TVK)-i toktepa ajanga parnok menden kar nungbo jenjang junga mali.

MK Stalin-i Kolathur menden nungi aser par jabaso Udhayanidhi Stalin-i Chepauk Thiruvallikeni menden nungi tokteptsü.

Tang Lok Sabha nung tetsür MP 74 lir

New Delhi, April 19 (Agencies): 18buba Lok Sabha nung MP tem shilem 18 dang tetsürtem lir; 2024 küm Lok Sabha election nung tetsür 74-i takok ngua liasü.

Tetsür MP tem ji party 14 nungi lir; BJP-i aniba NDA teloktep nungi tetsür MP 37 lir, Congress-i aniba INDIA teloktep nungi tetsür MP 35 lir, Shiromani Akali Dal nungi tetsür MP ka aser YSR Congress Party nungia tetsür MP ka lir.

Lok Sabha nung BJP nungi tetsür MP 31 lir aser ibaji party sasep nung shilem 13 shi lir. BJP den teloktep JD(U) nungi tetsür MP ana, LJP (Ram Vilas) nungia tetsür MP ana, TDP nungi tetsür MP ka aser Apna Dal (Soneylal) nungia tetsür MP ka lir.

Ano külen Congress nungi tetsür MP 13 lir, Congress den teloktep Trinamool Congress nungi tetsür MP 11, Samajwadi Party nungi 5 aser DMK nungi tetsür MP 3 lir. INDIA teloktep nung dena aliba NCP (SP), RJD aser JMM shia nungi tetsür MP kaka lir.

Party tem sasep nung tetsür MP teimba aliba tsütsü

Trinamool Congress (TMC) ya jenjang tasembuba nung ang lir, ajisüaka party tem sasep nung tetsür MP shilem teimba alibaji TMC (shilem 38) lir.

Parliament nung Women's Reservation Bill magizüktetba atema Honibar aonung Ato kilonser Narendra Modi-i opposition party tem aika tentüng tetshia aitsüba sülen West Bengal Chief Minister aser Trinamool Congress (TMC) tongti, Mamata Banerjee-i, "Ato kilonseri ochi jembitsü melen linük den osang tai lemsatepba ya tesasatsüka lir. Ni iba ya tejangja shidi. Tetsürtem teimba züngokba party ji Trinamool Congress lir. Parliament aser state legislature naprongla nung tetsürtem shilem teimba aliba party ji onok lir. Lok Sabha nung ozü MP tem shilem 37.9 bo tetsürtem lir. Rajya Sabha nunga onok tetsür shilem 46 lir. Anungji onoki Women's Reservation anema nokdaker, ta onok aitsütsü makok," ta metetdaksü.

Women's Reservation Bill magizüktetba atema Ato kilonser Congress, TMC, DMK aser Samajwadi Party tem ya 'tetsür anemertem' ta aija liasü.



New Delhi, April 19, 2026: Opposition party temi Constitution (131st Amendment) Bill anemba atema Amongnü Delhi Chief Minister, Rekha Gupta den BJP züngsemtemi Lok Sabha nung Opposition lenir, Rahul Gandhi'er kima longkak aitba noksa nung angur.

Tamil Nadu nung firecracker unit ka apokba lendong nung 19 asü

Virudhunagar, April 19 (Agencies): Amongnü Tamil Nadu nung Virudhunagar district kübok Kattanarpatti yimindak firecrackers yangluba factory ka apokba lendong nung yangji inyaker nisung 19 asü aser nisung trok yiruogo.

Iba lendong atalokba sülen nisung trok anasa aliba hospital kati anir ao.

Amongnübo anisüngzüka anogo lir, anungji iba anogo nung iba factory nungji mapa meinyaker, ajisüaka Amongnü mapa inyakbaji ajanga parnoki ozüng alema aibelen tuluka inyakogo, ta ketdangsertemi metetdaksü.

Iba osang prokba sülen, Tamil Nadu Chief Minister MK Stalin, Ato kilonser Narendra Modi aser linük Tir, Droupadi Murmu nungeri mangyim jashi lemsatepogo.

Tamil Nadu CM-i ketdangsertem dang takoksa

angurtem nem nungdakba teyari ajak agüjang, ta tuyuba den külemi state minister ana-KKSSR Ramachandran aser Thangam Thennarasu na dang yimtsüng jagi oa kümzüka maparen nungji yaritepang, ta tuyu.

Virudhunagar district ya firecrackers yangluba tiyongtsü tesem ka lir; tesüiba küm ishika tsüngda iba district nung lendong aiben atalokogo.

April 13 nüa iba district kübok Madathupatti nung Excel fireworks factory nung mi lendong tulu ataloka liasü aser 2024 küm February 17 nüa kasa district nung aliba firecracker factory nung lendong tulu ataloka nisung ter asü aser aika yirua liasü.

2024 küm June 29 nüa Virudhunagar district nung aliba firecracker unit ka nung mi lendong ataloka nisung pezü asü aser ka yirua liasü.



April 19, 2026 nü Kolkata kübok Sonarpur North Assembly constituency nung polling ketdangsertemi kibok sema kanga teintet sensotem nem vote agütsütsü atema election osettem bener aoba noksa nung angur.

House Speaker Mike Johnson-i Lai azüngba marathon tenzüksüogo



April 18, 2026 aonung Washington D.C nung 'America Reads The Bible' tetenzük sentong nung House Speaker Mike Johnson-i jembidang tangokba noksa nung angur.

Washington, Rongchii/April 19 (Agencies): Washington D.C nung hopta tepiyong Lai azüngba marathon Amongnü Museum of the Bible (MoTB) nung tenzüksüogo.

Iba tetenzük sentong ka April 18 aonung 7:00 ako nungi tenzüksüka agi saka Lai azüngba tenzüksüka yabo Amongnü anepdang 9:00 ako nungi ang tenzüksüka liasü.

Honibar aonung Washington D.C nung aliba National Community Church nung agiba sentongji live sayua liasü.

April 19 anepdang 9:00 ako nungi tenzüksüka sentong ya taruba Honibar aonung 9:00 ako nung tembangtsü. Anogo shia ghonda 12 Lai azüngtsü aser iba sentong nung yimsü lenir, yimtenren lenirtem aser celebrities aikati shilem agia Laishiba tetenzük nungi tatembang tashi -Lipok nungi Jungkai Adok tatembang tashi azüngtsü.

Amongnü iba sentong ya House Speaker, Mike Johnson-i tenzüksüogo.

Pa arrshi küm 12 asüba mapang nungi pai Laishiba nung tenangzükbatem ya atangji, ta meteta liasü.

Mike Johnson tebu, James ya firefighter ka liasü aser pa lanuwa mapang nung tebu duty nung lia lendong tulu ajurua temang shilem tulubaka rongka liasü.

Honibarnü 'America Reads the Bible' marathon tetenzük sentong nung jembidang Johnson-i, "Kübu temang kanga mejungi arongba agi teti atema temang lemata-a aküm. Iba mapang nungji pa taküm alitsü maongkaji shilem 5 shi dang liasü," ta ashi.

"Ni arrshi küm 12 asüba mapang nung ni Kibuba matsüngdang apudaker kübu taküm kümzükang ta sarasadem liasü. Ajioda Tsüngremi pa taküm kümzük. Lendong ajuruba sülen pa ano küm 30 dak tali ali," ta paisa metetdaksü.

Johnson-i, Apijemtsü Shin 30:5 ajanga "Tsüngrem O ajakji atangji" ta shia lir, aser ni kanga

lanuwa asüba mapang nungi ni ibaji angateta liasü, ta ashi.

"Ni atangji sayatenya atalokba angu. Iba otsüji kanga talang. Ni kübu den ajangshiba dak sendakba otsü kaket ka zülua lir. Tsüngremi onok sarasadem langzua liasü. Ni arrshi küm 12 asüba mapang nungi Tsüngrem Oji atangji aser shidak ta ni meteta liasü. Item tenangzükba nungji asenoki metaloktsüla," ta pai ayongzük.

Johnson ya Baptist Khristan ka lir. Iba sentong nungjisa yimsü lenirtem aser Khristan celebrities aikati pei taküm nung ajangshiba aser America nung puti otsü lemsatapa liasü.

Iba sentong ya Khristan melungtet telok Christians Engaged nungi Bunni Pounds leniba nung ayongzük.

Actress Candace Cameron Bure-ia, Laishiba tetenzük nungi tatembang tashi aiben azüngba ajanga la taküm nung temelenshi adok, ta ashi.

Laisa, "Laishiba medeni anogo ka danga süidaksütsü makok. Ni iba ya nüngdaker. Ni aginer. Ni tzürar. Iba ya Tsüngrem den kü mapang indokba lir. Laishiba ajanga Tsüngremji shibaar ashir. Pa ya taremsük Tsüngrem ka. Pa dak taochi lir. Ajak dak alia Pa dak temeim lir. Nai metetba temeim otsü tulutiba züngshiba kaketji Laishiba asütsü," ta ashi.

Laisa, "Kü tamang ajanga maongka aika mengutet aser tesendaktep raksa, ajisüaka iba atemaji ni mesasar. Itemji Tsüngrem den kü tesendaktep den taoba asü? ta ni aiben shisadanger. Obendangba anogo nung ni Tsüngrem matsüngdang nokdaksü. Ajak dak alia ni Pa shimtsü," ta ashi.

Kasa sentong nung WallBuilders Tir, David Barton-i University of Houston nung professor temi bushitetba osang ka metetdaksü liasü.

Kasa sentong nungjisa Christian Broadcasting Network nungi Billy Hallowell-i tanü putu nung anogo shia Lai azüngba ajanga teyari anguba lemsatap.

Hallowell-i, "Asenok tanela tongbang nung nokdaka lir. Asenoki atangji mangatetra asenoki asen taküm, yimtenren, loktilba aser asen sobaliba mangatetsü. Iba ya tanela tongbang lir aser tsükchirtem kanga tekülak. Asenok kanga yakyaka alitsü mapang tongogo," ta ashi.

Time to Revive tentetsang Kyle Lance Martin-i, Arogotemi Tsüngrem O nungi pilaadokogo, aser linük nung atangji tebilemstüji ibai lir, ta ashi.

"Kodang Arogoi Tsüngrem O nung lidir asen linük ya balaka akümtsü. Asen linük nung chichiba süngjang atangtsü. Khrista temang nung züngsema alirtemi Tsüngrem O dak azüiettsüla," ta paisa ayongzük.

Lai azüngba marathon tetenzük sentong tembangba sülen sentong tayonger, Bunni Pounds-i, "Ni nisungtem nem Yisu ajurudaksüner aser Tsüngrem O ngudaksüner," ta ashi.

Laisa, "Tsüngremi nü melungjang aginer, Pai nü taküm aginer," ta ashi.

"Yangi kü ket nung aliba kaket ya taküm aliba Tsüngrem den sendaktepa lir. Pai na meimer, nai atangji Pa nüngdaker. Asenoki lenmang balala ajanga tepela bushir, ajisüaka asenoki atangji iba (Laishiba) ya nüngdaker," ta laisa ashi.

"Kü ola angashir America nung ajaki anogo shia Lai zünga ajemalura asen linük ya ratamataba linük ka, tetsübu, tejashi aser tesempatep aliba linük ka masütsü, kechiyong asenok dak Yisu alitsü," ta lai ashi.

"Timtem ajak bentettsüasang Tsüngrem ka nem kodang senso ajaki anogo shia bendanga agütsüdir iba linükji komaka akümtsü? Nai ibaji shisadanger asü? America, nai ibaji shisadanger asü? Kechi ataloktsüar ibaji nai shisadanger asü?" ta laisa metetdaksü.

Bunni Pounds-i, "Onoki Tsüngrem O nung amanger, tongmelang agi Lai azüngba

mesüra angaba ajanga (Florida) nung densema lir. temlungjang melenshitsu, kibongtem, lokti aser linüktem nung temelenshi adokdaksü," ta metetdaksü.

"America küm 250 ajungba mapang telongjem aser tamang tashi nungtem nung onoki Laishiba azüngtsü mesüra angatsü atema America nungertem ayongzük," ta lai ashi.

Laishiba azüngba nung shilem agir yimten lenirtem rongnung Amb. Mike Huckabee, Senator Ted Cruz (Texas), Senator James Lankford (Oklahoma), Rep. Josh Brecheen (Oklahoma), Governor Greg Abbott (Texas) aser Rep. Greg Steube

Lai azüngba nung shilem agitsüpur Khristan lenirtem rongnung Dr. Ben Carson, Franklin Graham, Jonathan Cahn, A.R. Bernard, Lisa Bevere, Ryan Bomberger, Michele Bachmann, William Federer, Dr. Ronnie Floyd, Dr. Jack Graham aser Nick Vujicic nung densema lir.

Kasa sentong nung shilem agitsüpur celebrities rongnung Chonda Pierce, Kathy Ireland, Patricia Heaton, Candice Cameron Bure, Jen Lilley, John Cooper, Danny Gokey, Kim Walker-Smith, Meredith Andrews, Leeland Mooring aser Jennie Lee Riddle nung densema lir.



New Delhi, Rongchii/April 19, 2026: Amongnü Delhi Ao Baptist Arogo nung Imli P. Lemtur (ajichilen) sannüker mapa nungi aniokba sentong nung ABAM Church & Mission Secretary, Rev. L. Yapang Mollier-i Imli P. Lemtur nem tenangzükba agidaksüadang tangokba noksa nung angur.

ANOGO ABEN TSÜNGREM DEN

Temeshi Ka

"Pilati parnok dang ashi, iba nisung anema kechi taittsüba nenoki bener arur?" -Yohan 18: 29.

Ibai tasüngdangba tajung liasü. Yihuda nungeri Yisuji südaktsünü; saka iba tasüngdangba asüngdangtsü tim liasü. Tetendangba ka melii shinga aitsütsü makok.

Yisu aitsürtem dang kasa tasüngdangba asüngdangtsü asenok temeden kar. Pai kechi tai inyak? Pai shiba yirutsü? Yihuda nungeri Pilati asüngdangba melangzütet, kechiaser Pa aitsüba kuli bener marutet. Tetsür chanu kati tedi süngden nung enoker alidang pa teka nung mesep, aser tetsü dang ashi, "Oja, iba teka tila yagi kü dak kodanga mama". Khrista tesü ondaka ali dang, iba o ashitsü tapet, "Iba teka yagi shinga dak mama". Iba tebang mechi yagi temeim tesünep o jembi. Yirutsüsa o mejembi. Pa o teti taochi agi sünga liasü. Pai kodanga pa aitsütsüsa mejembi. Shinga dang pai mejungi meinyak; nisungi sempaba agi pa aritepa südaktsü.

Iba kasa Yisu tang nisung jakdang nokdaker, pamok temeim aser tamang asoshi asüngdang. Pa magizüksü kechi kuli lir? Pa mezüngmeshitsüsa Pai kechi inyak? Pa anema kechi kuli bener arur? Pa dak mulung alemer mulungjang kar teimla samadakja lir asü? Kechiba Pa magizüksü?

AO OSHI ANGAZÜKDAK:

TANÜ ANGAZÜKTSÜBA OJANG



Yabo

(adj) balaka shiteta sayuba (this particular one)

* Iba tanur yabo tangar ama masü.

Yagi

(adj) ileni, yangi (here, this way)

* Na yagi arua menangma.

OLONG PAITEP # 7479

1			2			3		4
5		6						
						7		
8								
								9
		10				11		
			12				13	
14								
						15		
16								

TIPLÉN

- 2. Auonungchiyongtsü asenba
- 5. Mangyimba mapang
- 7. O tamendakdak
- 8. Peidak malangba
- 10. Juli
- 12. Sen ayudak
- 14. Tenük agi ajitet
- 15. Tamajung aküm
- 16. Apuso

LANGTSÜNGLEN

- 1. Lenmang
- 2. Aor kidong ka tenüing
- 3. Tenarong maten
- 4. A ___ g
- 6. Mopung apodoka
- ola adokdaksüba
- 9. Tongtipang tagitsü
- 10. Menungra bilem
- 11. Aiür
- 13. S ___ k
- 14. T ___ r

OLONG PAITEP # 7478 TELANGZÜBA


TIPLÉN :

- 1. Yiar, 3. Tesola, 7. Yimra,
- 8. Tangar, 9. Peria, 10. Tanur,
- 11. Tasen, 13. Lemjem, 15. Tambu,
- 16. Khuret, 17. Sang.

LANGTSÜNGLEN :

- 1. Yimti, 2. Amen, 4. Shiner,
- 5. Alaka, 6. Satan, 9. Putet,
- 10. Tembar, 11. Tatok, 12. Amang,
- 14. Jala.

NAI-A YA METETTER



Egypt nunger Ashraf Mahrous Sulaiman-i 720-Tonne rong ka pa tepo agi atsür otetba atema Guinness World Record a yangluogo. Sulaiman-i September 27, 2025 nü El Ghardaka, Egypt nung 720.332 metric tonnes touzük rong ka atsür ao.

Arunachal Dy. Speaker Nyigyor-i Digo-Yamo benjung nung aden



Itanagar, April 19, 2026

(Agencies): Shi-Yomi district nung Adi nungeri April 18 nü Digo-Yamo benjung amundang Deputy Speaker Kardo Nyigyor-i nübertem dang pei sobaliba senmang kümzüka ayutsü ayongzük.

Iba benjungmung nung Nyigyor-i tongti tesemdanger ka ama shilem agi aser pai Boh, Ramo, aser Bokar (BRB)

nunger dang sobaliba takar, oshi aser maitsü wazüka ayutsü ayongzük.

Tanü alima ainba den anidaksüla saka kasa mapang nung lisopur sobaliba aser tangatetba kümzüka ayutsü nüngdak ta pai ashi.

Iba sentong nungsa Education, Tourism and RWD Minister P D Sona den Deputy Commissioner Tunnge Loya

aser tanga tongti ketdangsurtem aden.

Deputy Commissioner Loya-ia nübertem dang sobaliba wazüka ayutsü aser lanurtemi alima ainba den liromedema anidakba den külemi pei tera asoshi nüma atangtsü ayongzüka liasü.

Digo-Yamo benjung ajanga tsük aser menti prokba mongpu tenzükba sayur.

Assam nung LPG distributors 6 anentsüogo; nisung 3 apu

Guwahati, April 19, 2026

(Agencies): Assam nung ketdangsurtemi mita aodang nisung asem apu aser LPG distributors trok anentsüogo,

Oil Marketing Companies (OMCs)-i state sorkar den amalitepa state ajungalen iba mapa inyaker.

Tang tashi nung inspections 319 süogo, FIR ka benokogo aser LPG cylinders 274 puogo ta ketdangsurtemi ashi.

Assam ajungalen LPG aser

petroleum products supply shitak dang südar ta parnokisa ashi.

"LPG aser petroleum products ayokba nung tenokdangba kecha mali aser supply shitak dang lir" ta Indian Oil Corporation Executive Director & State Head, Nitin Bhatnagar-ia metetdaksüogo.

Tang ya anogoshia retail outlets ajanga petrol 29,350 kilolitres (KL) aser diesel 3,670 KL agütsür aser iba jagi perir.

Assam nung fuel retail outlets 1,737 lir aser item rongnung OMCs meyong 1,461 aser nija meyong 276 lir.

LPG consumers lakh 93 shi nem distributors 604 ajanga supply agütsür. Anogoshia refills 1.39 lakh shia asür aser backlog 4.28 days agiendar ta ketdangsurtemi metetdaksü.

LPG distributors 88 nem show-cause notices agütsüogo aser parnok 6 bo anentsüsüa tia ka nung lir.

CM Khandu-i nisung 461 nem appointment orders agütsü



Itanagar, April 19, 2026

(Agencies): Arunachal Pradesh Chief Minister Pema Khandu-i Combined Secondary Level Examination (CSLE) 2025 nung takok angur nisung 461 nem appointment orders agütsüogo.

Arunachal Pradesh Staff Selection Board ajanga department 26 nung Group C aser Group D atema tatidang agiba nung candidates 47,132 liasü.

Itanagar nung sentong ka nung CM Khandu-i takok angurtem nem tenüngsang

agütsü.

"Nenoki merangba, bendanga agütsüba, aremzüka ajanga takok nguogo aser iba asoshi nenok kibongtem dang pelar" ta CM Khandu-i ashi.

APSSB-i tashishitsü melii merit-based recruitment system agiba atema tenüngsang agütsür ta paisa ashi.

"Sorkar mapa inyakerteri tongti shilem agir. Nenok ya ketdangsubarem nung tongtirit lir aser nübertem services agütsütsübaaji nenok tebilemstü khuret lir" ta Khandu-isa metetdaksü.

Tang sorkar mapa nung tasen shimokertemi sorkar ketdangsubarem jenjang tajungba kümdaksütsü imlar ta paisa shisem.

Arunachal Pradesh Scheduled Tribe (APST) category nungi candidate temi general category nung unreserved seats 39 nung takok anguba ya kanga tongtipang lir ta CM Khandu-isa metetdaksü.

State sorkari Agniveer recruits kümsük tembangba sülen reservation provisions tenzüksü ta paisa ashi.

Ozü nuclear temeden shingai menokdangtetsü: Pezeshkian

Tehran, Rongchii/April 19 (Agencies): Tehran-i tang rara aliba ya akumtsübo agütsütepa tembangtsü meranger aser Iran indang nuclear tim temeden nokdangtsü shinga linük dak tashi mali, ta Iran Tir Masoud Pezeshkian-i ashi.

United States den nuclear ken o jembiba nung tanen makai tensa tamajung nung aliba mapang aser region nung security tebilemetsü agi sünger aliba mapang ka nung pai iba o ya ashi.

Iba rara tuluba akumtsü Iran tembilemba mali aser linük indang policy tem ya region tesunep aser tashi ita alitsü tangatetba nung lir, ta Pezeshkian-i ashi.

"Ozü nuclear temeden okdangtsü shinga dak temeden mali, aser onoki akhangba ya nisung ajak sako ama amshiba nung ajemdaka lir," ta pai ashi.

"Ozü tamendak dak ya region nung yimjung, tashi aiba aser security nung amendaka lir," ta ashi.

Tehran-i rara metenzük aser shinga linüka amaktsü tembilemba mali, ta Iran tiri ashi.

"Onoki iba rara ulutsü meranger masü, aser onoki kecha rara metenzük," ta pai ashi.

"Onoki linük kata amaktsü tembilemba mali aser onok ya özü sasa kumzüka ayutsü atema tejangja temeden dang amshir."

Tsükchir temi par nukjijong metongteter aser international law nung aibelen civilian infrastructure amaker, ta

Pezeshkian-i aitsü.

"Tsükchir temi par nukjijong metongtet, international laws nung aibelen aser ki o jen, schools aser mozüki tem amak," ta pai ashi.

"Iran-i nuclear temeden mamshitetsü ta Trump-i ashir, saka kechi mapa tamajung atemar mashir. Linük ka temeden nokdangtsü paji shiba?" ta Pezeshkian-i ashi.

Kasa mapang Iran ketdangsür kati ashiba agi, Tehran ya United States den tejak o tejak jitepa ajurutepa jembishinü tase tenzüksü renema mali, kechiaser Washington aginüba ya talitabong lir.

Iranian Deputy Foreign Minister Saeed Khatibzadeh-ia par linüki United States nem enriched uranium magütsüsü ta ashir, anungji Trump-i sangdongba den meputeper.

"United States nem enriched material kecha magütsüsü ta ni ashir. Ibai khenyongi makoktsü, aser ni ya dang shiner, onoki inyaktsüba tensa tamajung bentetsü onok renema lir, ajisüka khenyongi makoktsübo onoki magizüktsü," ta Khatibzadeh-i ashi.

Linük ana tsüngta osang lemsatepba lir, saka ajurutepa senden mementetsüsa ken o kar mangatetep aliba ama Khatibzadeh-i ashi.

"Shidakba senden amentsü jenjang ano metongteti lir, kechiaser America nungeri par

'maximalist position' metoktsüba ken o tem lir," ta pai ashi. Ajurutepa jembishinü masüdag "framework agreement" ka tatem kuma renemtsü Iran-i meranger ta ashi.

Pai United States dang sanctions dak sendakba nung Iran-i bilemba agizüktsü ajungshia liasü.

"Külen alirtemi özü tebilemetsü tongtiba angateta aser bentetsüla, aser itemji Iran nunger dak America nunger par mulung agi sanctions agütsüba ya lir aser iba economic terrorism yagi Iran nunger tangola mesashitetsü atema tenük yok aser Iran telung nung political structure anema nokdak daktür," ta Khatibzadeh-i ashi.

Iran ketdangsüri Tehran inyakim ya defensive lir aser kechi ceasefire südir süka Lebanon adentsüla, ta ashi.

"Iran-i tangatetba tajung nung jembishinü aka, ceasefire ka agizük aser iba ceasefire nung Lebanon densema linük ajunga adentsüla ta nisung ajak dang ashi."

"Iba sülen parnoki iba atema bilemba mali ta ashi aser mapa tamajung inyak tenzük," ta Iran deputy foreign minister-i ashi.

Jembishinü nung shilem ka ama Strait of Hormuz dak sendakba "new protocol" ka alitsü aser yimjung asoshi maneni jembishinüba mapang iba tzü lenmang ya civilian atema lapoka alitsü, ta paisa ashi.

Iran den jembishinü akatsü atema US ketdangsürtem Pakistan-i aotsü

Washington, Rongchii/April 19 (Agencies): US-Israel nati Iran den raraba tembangtsü nukjijong nung jembishinütsü asoshi United States negotiators tem Hombarnü Pakistan yimtiba Islamabad-i aotsü ta Tir Donald Trump-i sangdongogo.

Deobarnü social media post ka nung Trump-i Islamabad nung Iran negotiators den tsüngtong oa jembishinütsü asoshi US nungi shirnoksa yoktsüar tejangja masü. Taoba hopta tatemlen jembishinü akaba nung telemtetba ka magitet, koba nung US delegation ya Vice Prfesident JD Vance-i anir liasü.

Pa indang post nung Trump-i hopta ana ceasefire nung Iran-i aibelen ta aitsü, koba Bodhbarnü tembangtsü, aser Honibarnü Strait of Hormuz nung

Iran-i injang-bomb khaloktsü ta ashi. US-i agütsüba maongka magizükra Iran nung civilian infrastructure samatsüsü ta US tiri amokmerena lir.

"Onoki deal kanga tajung ka agütsür, aser parnoki aji agitsü ni imlar, kechiaser, parnoki aji magizükra, United States-i Iran nung power plant ajak, apu ajak raksatsüsü," ta Trump-i pa indang Truth Social sapang nung zülü. Asendenshir jembishinü akatsü atema Trump-i sangdonga aliba dak sendakba nung Tehran nungi telangzüba agüja mali.

Iran indang Tasnim News Agency ajanga ashiba agi, Iran nunger rongnendak mokdanga ali tashi Palistan-i negotiating delegation yoktsü Iran-i tangbo telemtetba agia mali.

US naval blockade ya ceasefire nung aibelenba aser ozüng alema mapa tamajung inyakba lir ta Iran indang Ministry of Foreign Affairs ajanga ashi.

Iba den Iran nunger ajunga nem asaa temerenshi agütsüba ya nisung meimchir anema mapa tamajung inyakba aser war crime ka lir, ta Foreign Ministry odongtar Esmaeil Baghaei-i X nung ashi.

Honibarnü Iran indang Islamic Revolutionary Guard Corps (IRGC) ajanga Strait of Hormuz ano shibangogo ta shia liasü, koba tanaben lapoker ghonda 24 majungdang shibang. US-i Iran nunger rong aser rongnendak tesemtem nung 'naval blockade' magien tashi iba tesem ya shibangtsü ta ashir.

Australia o Japan nati warship yanglu tenzüksü atema nangzüktep

Sydney, Rongchii/April 19 (Agencies): Australia nunger sen 10 billion (\$7 billion) alang Australia nem warships agütsüsü atema Australia aser Japan na Honibarnü tenangzüktepba yangluogo. 2014 küm military oset export masütsü atema tenokdangba agütsür aliba aginba sülen iba ya Tokyo asoshi military tsütsü yokyatsüya tulutiba asütsü.

Defence Ministers Richard Marles aser Shinjiro Koizumi nati tenangzüktepba nung sign süogo aser iba ajanga warship tem takok ngua agütsüsü atema Australia aser Japan sorkar bendanga agütsür aliba tali nenshir, ta Marles-i kasa sangdong ajanga metetdaksü.

August ita tenangzüktepba yangluba ajanga China nem telangzüba agütsüsü asoshi US den tesendaktep ayuba dak alia Japan tanga linüktem dena tesendaktep ayutsü jenjang agiba sayur.

Mitsubishi Heavy Industries-i, Royal Australian Navy nem Japan nung yangluba upgraded Mogami-class multi-role

frigates asem 2029 küm nungi tenzüka agütsüsü. Maneni rong ti Australia nung yanglutsü.

Japan Defence Ministry-i X ajanga, Koizumi aser Marles nati General Purpose Frigates atema contract tembanga renemba pelashishia agizükogo aser defence dak sendakba nung bilateral tesendaktep akangshitsü nangzüktepogo, ta ashi.

Mezüngbuba rong asem yanglutsü atema contract nung sign süogo, koba Japan nung yanglutsü. Iba sülen Western Australia kübok Perth anasa Henderson shipyard nung tanungba rongtem yanglutsü," ta Marles-i ashi.

Iba rong ya submarine tem bushia aotsü, tzüyim nung rongtem amaktsü aser air defence agütsüsü atema design süa lir aser Australia-i item rongtem ya tzüyim nung tongtibang shishilembaba lenmangtemi yoktsü aser Indian aser Pacific Ocean north leni yoktsü sentong lir, kong China indang military atsülanga odar.

North Korea-i ano ballistic missile tem tendangogo



Seoul, Rongchii/April 19 (Agencies): North Korea-i linük anütok tzüküm leni ballistic missile ishika khaketa yokogo, ta South Korea aser Japan nati metetdaksü.

Deobarnü item missile tem tendangba densema North Korea-i taküm ballistic missile tenetbenbuba tendangogo aser April ita kija pezübenbuba missile tem khaketa yokogo.

Missile tem ya North Korea anütok tzükümlen Sinpo yimti anasa nungi Deobarn anepdang 6:10 ako shi nung khaketa yoka liasü, ta South Korea indang military-i sangdong ka ajanga metetdaksü. Parnokisa, South Korea-i inyakim kanga junga meita atadar aser United States o Japan na den osang lemsatepdar, ta ashi.

Kasa mapang nung Japan sorkaria social media ajanga, ballistic missile tem ya Korean Peninsula anütok tzüküm anasa tsüker alitsü ta amanger ta ashi. Japan indang exclusive economic zone nung missile tem tsükba indang osangbo parnoki kecha magütsü.

South Korea tir office sangdong ka ajanga ashiba agi, parnoki jongdak security senden ka menogo, ta media sangdong balala ajanga metetdaksü.

Iba amai missile tendangba ajanga North Korea indang missile programme anema United Nations Security Council bangzüng yanglur aliba nung aibelen. Ajisüka North-i UN-i parnok nem tenokdangba agütsüba ya magizüker aser ashiba agi, iba tenokdangba agütsüba ya parnok temeden anema lir.

China aser US na May ita tom nung summit ka ayongzüka amentsü atema renemba mapang tang item missile tem ya tendangogo. Iba summit nung China tir ?Xi Jinping aser US tir Donald Trump na North Korea dak sendakba ken o sensak asemtsü imlar.

North Korea-i uranium enrichment facility ka amenokba sülen nuclear weapons yanglutsü atema tashi kanga ita kümogo, ta International Atomic Energy Agency tekolakba Rafael Grossi-i Bodhbarnü metetdaksü.

Taoba ita North Korea lenir Kim Jong Un-i ashiba agi, par linük ya nuclear weapon aliba linük ka lir aser iba jenjang ya melenshitsü makoktsü aser linük security atema "self-defensive nuclear deterrent" atsülangtsü ya kanga tongtibang lir ta ashi.



Islamabad, April 19 : Pakistan linük nung aliba Rawalpindi nung Nur Khan airbase anasa April 19, 2026 nü sepaitem duty nung aliba noksa nung angur. US-Israel tsüngta tanaben senden amentsü imlaa alidang Pakistan-i linük yimtiba Islamabad aser anasa Rawalpindi yimti ya 'high security alert' nung yua lir. Yimti ana nung police personnel 20,000 den yarisema snipers densema elite commandos noklang aika security duty atema yoka lir ta ashir.

Muzarabani nem tenokdangba agütsüba pa indang agency-i aitsü



Rongchii/April 19, 2026 (Agencies): Zimbabwe nunger pacer Blessing Muzarabani tang mepetmesü ka teyongsü nung lir aser Pakistan Super League-i pa nem küm ana atema tenokdangba agütsüba ya pa indang agency-i aitsüo.

Muzarabani ya tang IPL 2026 nung Kolkata Knight Riders nungi asaydar, aser pai IPL nung asayatsü atema maongka agütsüba ya agitsü atema PSL nung tenangzüktepba yanglur aliba toksüba atema merenshi.

Ajisüaka pa indang representatives-i iba ken o ya jangjashitsüo aser ashiba agi, formal contract kecha nunga sign masü anungji pa nem tenokdangba agütsüba ya tamendakdak mali.

Muzarabani ya PSL nung

tanga asayar melena asayatsü asoshi tenangzüktepba yanglutsüpur rongnung densema liasü, aser osang ajanga ashiba agi pa PKR million 11 alang tenangzüktepba ka yanglutsü renemer liasü, saka Mustafizur Rahman melena KKR nung aden. Pai iba telemtetba agiba sülen Mohsin Naqvi-i anir PSL-i pa anema jenjang agi aser ashiba agi, pai tenangzüktepba anema inyaksangshia liasü. Ajisüaka asayar indang agency, World Sports Xchange-i iba temerenshi ya magizük aser ashiba agi, pa nem temerenshi agütsüba tamendakdak ya meshidak.

"Contract anema kecha inyaksangshia masü," ta Muzarabani indang agency-i ashiba den pa nem

tenokdangba agütsüba ya tali tabong jenjang agiba lir, ta shisem.

Agency-i ashiba agi, Muzarabani den Islamabad United-i tongtep aser Zimbabwe Cricket nungi No Objection Certificate angu nungdang pa tenangzüktepba tembanga yanglutsü liasü. Parnokisa, iba amala NOC angutsü atema valid aser sign sür aliba contract ka nungdaker koba pa nem kodanga magütsü.

"Nai kodanga magizükba contract ka nung koda aibelentsü," ta agency-isa metetdaksü.

Maneni agency yagi ashiba agi, KKR-i Muzarabani den February 27 nü tongtepratepba mapang pa IPL nung asayatsü asoshi maongka agütsüba ya magizüktettsüsa kecha tenangzüktepba yanglur maliasü.

Parnoki ashiba agi, pa nem tenokdangba agütsüba ya tera tali, aser taoba mapang contract nung aibelenba atema merenshiba den balaka. Parnokisa iba ya inyakyim nung aibelen ka ta shia iba tenokdangba agütsüba ya agintsü PSL dang mepeshia metetdaksüo.

Uber Cup nung Treesa -Gayatri melena Shruti -Priya shimogo



Shruti Mishra aser Priya Konjengbam noksa

Rongchii/April 19, 2026 (Agencies): Thomas & Uber Cup masaya tsungda Treesa Jolly aser Gayatri Gopichand na masayatetsüsa akümba ajanga India tetsür team tashi meiti kümogo. Treesa yiruba ajanga tena masayatetsüsa kümogo.

Ajisüaka tena melena Badminton Association of India (BAI)-i Shruti Mishra aser Priya Konjengbam na shimogo.

"Treesa Jolly aser Gayatri Gopichand na Thomas & Uber Cup Finals 2026 nung shilem magitsü, kechiyong Treesa yiruogo. India tetsür team nung Shruti Mishra aser Priya Konjengbam nati tena meleno," ta BAI-i sangdong ka ajanga metetdaksü.

Tena ya iba ita tetenzüklen asayaba Badminton Asia Championships nunga masaya.

Taoba ita Swiss Open 2026 badminton tournament tetsür tarep asaya mezüngbuba round nung Treesa yiruba sülen tena iba asayamung nunga masayatet. Iba asaya nung Treesa aser Gayatri nati 7-13 agi Chinese Taipei nunger tarep Hu Ling Fang aser Jheng Yu Chieh na memenepi aliba mapang Treesa yirua masayatetsüsa aküm.

Iba asayamung ya Horsens, Denmark nung April 24 nungi May 3 tashi asayatsü. Taruba Thomas Cup ya iba asayamung 34buba aser Uber Cup ya 31buba asütsü.

Kasa mapang nung Uber Cup team nung asayar tejen aser tasentem ajak meyoktepa lir, shirnok Olympic medallist PV Sindhu lenisüba nung asayatsü, aser tang kanga kara renloka

oya aliba lanur asayartem rongnung Unnati Hooda nunger amala asayar densema lir.

Iba asayamung nung India team European Team Championship runners-up Denmark, bronze medallists Ukraine, aser defending champions China nunger den ata lir.

2024 küm Chengdu nung tatemsa Thomas & Uber Cup asayaba mapang India tetsür team quarterfinals nung Japan-i tsükdakja liasü. India tetsür team-i 2014 aser 2016 küm bronze medal nguogo.

India tetsür Team:

PV Sindhu, Unnati Hooda, Tanvi Sharma, Devika Sihag, Isharani Baruah, Kavipriya Selvam, Simran Singhi, Tanisha Crasto, Shruti Mishra aser Priya Konjengbam.

Real Sociedad-i Copa del Rey final nung Atletico Madrid kokogo

Rongchii/April 19, 2026 (Agencies): Honibarnü Copa del Rey nung Real Sociedad-i penalty metsütepba sülen Atletico Madrid goal 4-3 agi kokogo. Asaya ya goal 2-2 agütsür tembanga sülen penalty metsütepba mapang goalkeeper Unai Marrero-i spot kick ana tashi nokdanga par team-i iba asayamung pezüben akokba nung teyari agütsüo.

Sociedad-i tatemsa iba Cup ya 2021 küm koker liasü. 2020 küm atema iba asayamung final ya thinener La Cartuja stadium, Seville nung asaya, saka COVID wara pokteter aliba ajanga terpranger medeni asaya liasü.

Ajisüaka takümbo Basque club yagi fan temi repranga asaya kokogo. Penalty metsütepba mapang Atletico nungi Alexander Sorloth aser Julian Alvarez nati mezüngbuba metsüba penalty ana ya Sociedad goalkeeper Unai Marrero kümzüka liasü.

Iba sülen Atletico keeper Juan Musso-i Orri Oskarsson-i metsüba ball nokdang, saka Pablo Marin-i süngjemshir tatembangbuba penalty kanga junga metsüokja parnoki asaya

akok. Team ana ya tatemsa final ka nung 1987 küm asaya. Iba mapanga goal 2-2 agütsür tembang aser penalty metsütepba Sociedad-i koka liasü. Atletico pur 213 sülen tang mezüngbuba Copa del Rey akoktsü atema meranga asaya liasü.

Asaya nung Ander Barrenetxea-i second 14 nung dang Sociedad atema mezüngbuba goal idaktsü, saka Ademola Lookman-i minute 19buba nung iba goal ya küptok. Maneni Mikel Oyarzabal-i asaya mezüngbuba shilem tembangtsü lia penalty ka ajanga Sociedad asoshi tanabuba goal idaktsü.

Iba sülen asaya tanabuba shilem atemtsü minute tenet dang anunga lia Alvarez-i Atletico atema tanabuba goal idakja goal kasasa aküm aser iba ajanga mapang talila asayatsüsa aküm.

Diego Simeone-i aniba Atletico team ya anogo ishika tejakdang-ang Champions League semi-finals-i iogo, saka America nunger coach Pellegrino Matarazzo-i aniba Sociedad team-i parnok kokogo.

Ayush Mhatre taküm IPL nung ojang dang asayatetsü akok

Rongchii/April 19, 2026 (Agencies): Chennai Super Kings (CSK) coach Mike Hussey-i, Ayush Mhatre indang osang agütsüo aser ashiba agi, batter ya hamstring yirua liasü. Mhatre ya Sunrisers Hyderabad pur den asayaba mapang yiru.

Iba asaya nung pai ball 12 nung run 30 yanglur aliba mapang hamstring yiru aser taruba ball nung pa out süatok.

Hussey-i ashiba agi, pa koma yiru iba indang osang tejangja ya scan asüba sülenang jangjatsü. Paisa, tema nungibo pa kanga mejungi yirur alitsü ama reprangteter, ta ashi.

Hussey-i, Mhatre masayatetsüsa akümba ya team asoshi kanga takoksa asütsü ta ashi. Mhatre ya tang asaya aliba IPL nung CSK pur batter ajak rongnung tajungtiba liasü. Pai tang tashi nung run 201 yanglur liasü aser asaya junga tenzüksü atema par team pa dak metaloker liasü.

"Pa hamstring yiruogo. Pa koma yiru ajibo ni mejangja. Onoki pa asüng mesüra yanü scan asüi anir aotsü," ta CSK batting coach Mike Hussey-i asaya tembanga sülen osangbenertem den sensaksemba mapang ashi. "Tia

maka pa kanga mejungi yirur alitsü ama reprangteter. Pa yiruba ya team asoshi kanga takoksa asütsü, kechiyong pai kanga junga asaya arudar."

Iba asaya nung Ayush Mhatre yirur out asüba sülen CSK pur batting order chirepa liasü. Parnoki run 66 yanglur asayar 1 dang out sür liasü, saka pa out asüba sülen team-i junga masayatet aser run 10 agi asaya makok.

CSK pur bench nung Urvil Patel kija batter lir aser pai CSK squad nung Mhatre melentsü imlar. Hussey-i ashiba agi, Mhatre yiruba ajanga CSK nem lanur asayar kar tendangtsü asoshi maongka agütsütsü shirnok iba maongka asoshi atatepdar.

"Pa asayar tajung ka, saka iba ajanga tangar kar nem maongka agütsütsü, anungji ibajia jangrademtsüka lir. Onok team nung asayar tajung kar lir shirnok tang tashi maongka mongui lir. Anungji iba ya item asayartem asoshi jangrademtsüka asütsü," ta Hussey-i ashi.

Mhatre kodang tashi nungi asayatetsü mejangja aser scan agiba sülenang jangjatsü, ajisüaka Grade 2 tear ka aneptsü atema hopta trok shi agir.

BILEMDANGANG

"Khen jashidang teti atema sasatsüsa jenjang tagi."